



Mir kenne Euch noonig, drum näme mir uns am Aafang zruug
und geen dr erscht Värs logger aa - ohni Drugg.
Mir hän kai Ahnig wie ihr druff sind - und ob epper do inne spinnt,
Denn schliesslig wän mir jo vo Euch nit no - e Schueh an Grind.

Unsere Gitarrischt verhebt nit - dä bhalte mir nimm lang,
är het kai Rhythmus, längt amme drnäbe und är bringt kai suubere Klang.
Hän ihr das jetzt grad gheert?? - Jetzt het är wieder gschummet,
Jääh, dä het bis vor e baar Monet no bi Top Secret drummet.

I ha letschhi e alte Bekannte us Eschtrych wieder gseh,
mir hän pläuderlet yber vergangeni Zyte und yber d'Farb vom Schnee.
"Kumm verzell, wievil Kinder hesch jetzt?", ha'n i vo ihm wisse welle.
Do het är gsait: "Ich muess z'erscht in Käller - go noochezelle."

Wo an dr EURO Rakitic und Petric die härzigi, rundi, glaini Balle
us elf Meter - fir Kroatie - lieblos in Nachthimmel knalle:
Ha ich fir mi dänggt - und ich loss das do yfliesse:
"Die Zwai sin halt doch ächti Schwyzer - eso wie die Penalty schiesse!"

D'Bedytig vo'mene Vorname uuse z'finde isch nit schwer,
so haisst Andrea "die Tapfere", Verena "die Schüchterne", Barbara "die Fremde" und Gertrud
haisst "der Speer".
Es haisst Peter "der Fels", Felix "der Glückliche", Roland "der Kühne", so sage's uns d'Dich-
ter
Und wie mir schwer vermuete - haisst Marcel: "Der Geldvernichter".

Wenn ich uff dr Wach stand in dr Armeeschliess ich jetzt nimme mit Bley.
Uff Befähl vo oobe rett ich d'Schwyz mit eme schnuggelige Pfäfferspray.
Und wenn dr Gegner kunnt, mach i folgendes - so wän's dängg die VBS-Trotyle:
"Z'erscht wirf i e Wattebausch und denn fang i afo hyyle."

Salut les Bâlois - isch bin Gilbert Gress - und isch habe trainiert grosse Equipe,
Strasbourg, Marseille, Xamax und auch Baschi - diese nischt talentierte Typ.
Chaque jour, isch bekomme viele Offert von Club, wo isch könnte auswählen,
aber isch bleibe bei Schweizer Fernseh, wo isch kann nur Schissdrägg erzählen.

My Frau het mi gfrogt - und ihri Auge hän g'lyychtet voll Vertraue:
"Wenn ich emol gschtorbe by - tuesch du denn käschperle mit andere Fraue"?
Do han i gsait - ganz treuhärzig - wie wenn i fir e Hundegutzi wurd wärbe:
"Los Schatz - wäge däm muesch doch du nit äxtra stärke!"

**Wenn de kai Konzäpt und kai Strategie hesch im Lääbe
dr ganz Daag Leerläuf produziere, isch di ainzig Besträäbe.
In dim Umfäld schisst's alli aa, nit emol meh d'Putzfrau het Spass,
Jääh, me het's nit aifach als Regierigsroot, gälle si, Herr Gass?**

**Hyroote isch bi de wyyblige Wääse immer weniger Trumpf
Egal, ob si e Mister Universum griege - oder irgend so e Schlumpf.
In dr hyttige Zyt, do sait sich halt mängi Frau:
Wenn i nur e Wyrschtli will, kauf i jo au nit e ganzi Sau.**

**Wenn mit dim Auto ruggwärts fahrsch - kennt's irgendwann "bip bip bip" mache.
Fir uns haisst das: Achtung e Muur, e Baum - oder so ähnligi Sache.
Fir die maischte Fraue haisst das gar nyt - und i sag euch worum,
Bi däne machts "bip bip bip... - biiiiip" - und denn macht's "Bumm"!**

**Im Schützemattpargg het me - tief im Bode unde,
so e verjäästs Tail, wo e bitz usseht wie e Riebli - gfunde.
Me het's lo analysiere und het denn festgestellt - fir e huffe Gäld,
s'isch no vo dr EURO - e Holländer und sy Zält.**

**Hey Mann tschöss - weisch in Bundesroot - sin alles komischi Sieche Mann, griegsch fascht
Panik.
Weisch Mann Pascal, will immer Chef si Mann - Ueli isch bitzeli blöd Mann und weisch Mann
Hansruedi het vo Stutz kai Ahnig.
Denn weisch Doris und Evelyne hän sooo Auge Mann und weisch Mann Moritz staggelet wie
Kind
Aber ey Mann voll krass isch Micheline - het vollgeils Kopftuech uff em Grind.**